

Latih golongan Muslimah bermain skateboard

Oleh KHAIRIYAH HANAFI

12 Mac 2017

SEJAK dahulu lagi, umum mengetahui skateboard atau permainan luncur papan selaju merupakan sukan yang dimonopoli oleh golongan lelaki. Bagaimanapun, sukan tersebut kini semakin mendapat sambutan dalam kalangan wanita terutamanya bagi golongan Muslimah.

Ternyata, imej sebagai gadis Muslimah tidak menjadi penghalang buat mereka yang meminati skateboard untuk melibatkan diri dalam aktiviti sukan itu.

Justeru, tidak hairanlah jika ramai dalam kalangan remaja Muslimah pada hari ini sanggup menghadiri kelas-kelas skateboard bagi memahirkan diri mereka di dalam sukan tersebut.

Menurut Presiden Kelab Skateboard, Adlan Farazi Mohd. Arif, 39, idea untuk mewujudkan kelas My Skateboard Lesson yang mendedahkan mengenai teknik-teknik meluncur dengan papan selaju kepada remaja Muslimah sebenarnya diilhamkan oleh penceramah muda terkenal, Ustaz Don Danial Biyajid.

"Sebenarnya My Skateboard Lesson telah bertapak sejak tahun 2015 apabila Kelab Pembimbing Rakan Muda memberi peluang kepada kami untuk melatih anak-anak muda yang berminat di dalam sukan ini.

"Walaupun sesi latihan bersama kelab tersebut telah berakhir, namun kami masih lagi mengekalkan nama tersebut sehingga ke hari ini dan mengajar individu yang berminat untuk bermain skateboard.

"Bagaimanapun, sekitar pertengahan tahun lalu, Don Danial yang juga merupakan Penaung Kelab Genesis Skateboard di Kolej Universiti Islam Antarabangsa, Selangor menjemput kami untuk memberi latihan kepada kelab tersebut.

"Pada waktu itu, kami agak terkejut dan teruja apabila melihat majoriti yang menyertai sesi latihan skateboard merupakan gadis-gadis Muslimah. Jadi dari situ timbul idea untuk mewujudkan kelas skateboard bagi golongan tersebut," jelasnya.

Menurut jurulatih yang turut dikenali dengan nama Boy Ipoh itu lagi, dia tidak menyangka minat golongan wanita terhadap sukan tersebut sama seperti golongan lelaki kerana penyertaan yang diterima begitu memberangsangkan sehingga ke hari ini.

"Menerusi My Skateboard Lesson, individu perlu menghadiri sesi latihan pada setiap minggu.

"Selain sesi latihan yang dilakukan secara teori dan praktikal, kami turut mengajar cara menyelenggara skateboard serta seni menghias badan papan selaju tersebut," jelasnya.